



विश्व



द यो

ਨੇਰੋਰ ਹੋਏਪੁ ਪੁਛਾਰੋਪੁ ਲਬਛਾਤੀਨਏ

ਸ਼੍ਰੀ ਗੁਰੂ ਗ੍ਰੰਥ ਸਾਹਿਬ

ੴ ਸਤਿਨਾਮੁ



१९९१ - १९९२

कृष्ण  
कृष्ण  
कृष्ण  
कृष्ण  
कृष्ण  
कृष्ण  
कृष्ण  
कृष्ण  
कृष्ण  
कृष्ण

हू हिसु पुचःया पिथना

हू  
**हिसु** दँयो

Nhoo hisu yearly magazine

भूँ : द

ने.सं. ११३४ कछलाश्वः पारु

ल्याः द

## लोकचरित्रबारे कुखिनातःगु छपु लोकम्ये



सहप्रा. तुलसीलाल सिंह

नेवाःत म्ये यःपिं, म्ये ह्यःपिं जाति खः । नेपालय् नेवाःत थें म्ये हालेन्त्याःपिं मेपिं छुं जाति मदु । नेवाःतय्गु ख्वातुगु बस्ती दुगु यें, यल व ख्वप जक मखु कि नेपाः देय्न्त्यंक हे गन(गन नेवाःतय्गु गां-बस्ती दु अन-अनन्यंक हे देगः, सतः, फले आदिथासय् नेवाःतय्गु भजन याय्गु चलन आःतकं मतनि । थजाःगु भजनय् देवी-देवतापिनिगु सगुण व निर्गुण भक्तिया म्ये हालीगु ला जु हे जुल उकीसन छपुधुंकाः मेगु, मेगुधुंकाः हानं मेगु म्ये नं भवःलाक हालेमाःगु प्रचलन नं दुगु हे जुल । गथे, भजनया शुरुइ गणेद्यः, नासःद्यः हालाः दकसिबेलिपा आरती-म्यें क्वचाय्कीगु छगू आम प्रचलन हे जुल । उकीसन मेमेगु म्ये थाय्कथं हालेमाः । नेवाःतय् थीथी नखः, जात्रा, पर्व वइ । व हे जात्रा, पर्व, नखः अनुसार नं म्ये हाले माः । छगू पर्वय् हाःगु म्ये मेगु पर्वय् हालेगु वर्जित जुइ । छगू नखःबलय् हालीगु म्ये मेगु नखतय् हालेमज्यू, हालीमखु । गथे, होलीया म्ये मोहनीनखतय् हालीमखु, मोहनीया म्ये पाहांचःढ्य नखतय् हालीमखु आदि । अथे हे ऋतु, महिना आदि ई स्वयाः नं ब्यागलं-ब्यागलं म्ये हालेमाः, नेवाःतय् ।

नेपाः छगू कृषिप्रधान देय् खः । आपालं नेवाःत नं कृषिपेशाय् निर्भर जू । आः थौंकन्हय् जक शहरी नेवाःत कृषिपेशा त्वःताः मेमेगु पेशाय् आकर्षित जुयावनाच्चंगु खः । गांगामय् ला आः नं कृषि हे नेवाःतय्गु मूख्य पेशा खः । न्हापा-न्हापा आपालं नेवाःत कृषिपेशाय् संलग्न जूगु जक मखु आपाः हे बुं दइगु जूगुलिं यक्व-यक्व हे बुंज्या याय्माः । नेवाःतय् धाइगु हे दु कि सिन्हाज्याबलय् ला थुलि ज्या याय्माः कि सुयां छेंय् मनू सीसां सीम्ह छेली तयाः जूसां सिन्हाज्या याय्माः । सिन्हाज्याबलय्

आपा: हे दुःखसिया: दछि नयूत अन्न मुंकी स थुकथं हे नेवा:त नसात्वंसाय् सम्पन्न जुइ । अथेजुया: नेवा:तय् सुख, दुःख, माया-मतिना, ख्यालिन्हिलि, रतिराग आदि अनेक भाव प्वंकात:गु सिन्हाज्या राग वा सिन्हाज्या लसय् हालात:गु प्राचीन म्येया त:धंगु धुकू हे दु ।

सिन्हाज्याज्व:छि यक्व दुःखसीधुंका: छुं भचा फुर्सद दइ । महिनाकथं गुंला नं वइ । थ्व महिनाय् धा:सा नेवा:तय्सं थीथीकथंया नख: हना: धुमधामनक्सां मनोरञ्जन याइ । थथे मनोरञ्जन यायां सिन्हाज्यां आपालं परिश्रम यानागु नं ल्व:मुंकी । आपालं छ:पिनिगु पूजाआजा नं थ्व हे लाय् (महिनाय्) याइ । वैष्णवी, बौद्ध, शैव आदि सकलें सम्प्रदायया मनूत धर्मकर्मय् व्यस्त जुइ । मतया:, सापारु, जनैपूर्णमा आदि पर्व थ्व हे लाय् ला: । थ्व इलय् सिलुतीर्थ वनीगु नुग: हे खुल्लखुल्लमिनीगु करुण रसया म्ये, सितलामाजुयात याचना यानात:गु निर्दयी जुजु रणवहादुर शाहं कचिमस्त पित्युंगु अति हृदयस्पर्शी म्ये नं हाली । यौनजन्य हाउभाउ याना: अस्थ:-अस्थ:गु म्ये नं थुबलय् हाली । थुकथं हास्य व श्रृंगार रस पितव्वव्वं थ: मदुपिं स्वजन व प्रियजनपिन्त नं हे लुमंकीगु अजूचायापुगु परम्परा नं हनी । थ:थ:गु देशाचार व लोकाचारकथं नेवा:त च्वनाच्वंगु थीथी थासय् थीथी ढंगं, थीथी शैलीं साया: पर्व हनी ।

गुंलाया साया: पर्वया भवलय् यलय् नासलं लीपिं सोखिन कलाकारत थ्व:थ्व: मुना: ख्याल: दय्की । थ्व छगूकथंया लघुनाटक थें हे ख: । ख्वा:पालं पुया: वा मपूसे थीथी हाउभाउ अभिनय याना:, थीथीकथंया सम्वाद ल्हाना: वा म्ये हाला: त्वा:त्वाल्य् वना: ख्याल: क्यनेगु याइ । तत्कालीन विशिष्ट व्यक्ति, राजनैतिक नेता, शासक व समाजया हर्ताकर्ता न्ह्यलुवा जक मखुसे समाजया थीथी वर्गयात हास्यमिश्रित ध्याचू नकेगु याइ । थ्व सलंस: दँन्ह्य:निसे न्ह्यानावयाच्वंगु संस्कृति ख: धाय्फु । प्राचीन ग्रीसया निद्र:-स्वद्र: दँन्ह्य:या 'कामदी' (Comedy) लिसे ज्वला:गुलिं नं थ्व पुलांगु परम्परा ख: धाय्फु । निश्चित इलं न्ह्याना: निश्चित इलय् थथे ध्याचू नकेगु ख्याल: दिदी । थथे थजा:गु ख्यालकय् कुंखिनीगु, ध्याचूनकीगुयात समाजं छुं पूर्वाग्रह मत:से स्वस्थ रूपं ग्रहण याइ । थ्व छगू नेवा: समाजया बांला:गु संस्कृति ख: ।

तर, यँय् धा:सा गुंला लच्छि स्वयम्भुइ ग:चा:हिलेगु याइ । थ्व छगू बौद्ध परम्परा जूसां सु वैष्णव, सु शैव, सकलें वा आपालं मनूत ग:चा:ह्युवनी । थुबलय् थ्व:थ्व: मनूत मुना: समाजय् मनीगु, मभिंगु रीतिथिति, समाजया थीथी जात व वर्गयात ध्याचूनका: म्ये हालावनीगु चलन दु धाइ । थजा:गु हे छपु म्ये यँया अन्तिम मल्ल जुजु जयप्रकाश मल्लया शासनकालय् धनन्त धइम्ह छम्ह कवि



नेसं ८६४ स छपु म्ये थथे चिनातःगु दु, गुगु दकसिबय्न्हापां भी लय्पौ नेसं  
१०९८, त्याः(?) स पिदंगु खः । थ्वलिसे ज्वःलाःगु छपु म्ये काशीनाथ तमोटया  
सम्पादनय् (पुलांगु मे मुना । कान्तिपुर : नेपालभाषा परिषद) पिदंगु दु ।

ॐ नमो बुद्धाय,

लोकया चरित्रस ख ल्हाय,

मि मिसा मते दुख ताय । (१)

(ॐ नमो बुद्धाय । लोकया चरित्रया खँल्हाय् । भाजु मय्जुपिसं दुःख ताय्केमते ।)

ॐ नमो गणपति सहाय,

मिराव मुडाव हय,

थिथि मन ल्हाय । (२)

(ॐ नमो गणपति सहाय । मिराव(?) मुनाहय् । थीथी मनया खँल्हाय् ।)

अथ शाक्यमुनिजुस मार सेवा याय,

तनमन थ्व धरम एकचित्त याय । (३)

(न्हापां शाक्यमुनिया सेवा याय्माल । तनमनं थ्व धर्मय् एकचित्त याय् ।)

मते मते मनुष्यन मखु कर्म याय,

मफो लात्र धर्म दने भिजिस उपाय । (४)

(मनूतय्सं मखुगु कर्म (मभिंगु ज्या) याय्मते । भीसं चानन्निनं धलदनेगु उपाय  
याय नं मफु ।)

चैत्य सुमरपाव थ्व धरम याय,

थ्वति ग्यड मद्, तवो धर्म कर्म याय । (५)

(चैत्य लुमंका थ्व धर्म याय् । थ्वति ग्यंगु मेगु तःधंगु धर्म याय् नं मद् ।)

सम्बत च्यासल खुयपिस दस ल्हाय,

नसचास गुनिलास ओ सेंगु थजाय,

भगतिन मन तसे दरसन लाय । (६)

(नेपालसम्बत् ८६४ या दँय् थ्व खँ ल्हाय् । गुंलाबलय् नसंचाय् सेंगु थाहाँवने ।  
भक्तिभावं मन तयाः दर्शन लाय ।)

यया यथे मदु मनुष जन्म काय,  
थुगुलि सियाओ भिजि पापओ तापाय,  
चोने मदु संसारस माया अति छाया । (७)

(यःपिनि यथे मनुष्यया जन्म काय्मदु । थजाःगु खँ सीकाः भी पापनाप तापाय्नु ।  
चवनेमदुगु संसारय् अति माया काय्गु छाया ?)

थ्व जुगया मिसातोस चरित्र ख ल्हाय,  
चुल्य म्हर बिरडाओ जातपात छाया,  
बिओम्हया खओ जात तओ धाय । (८)

(थ्व युगया मिसापिनिगु चरित्रया खँल्हाय् । चुल्या, म्हर तिसा बिलधाःसा जातपात  
नं स्वैमखु, थथे व्यूम्हसिया जात हे तःधं धाइगु ।)

सति ओय धक लोगि भालत हेयके छाया,  
थुगुरि कथन थम दको बयतु लाय,  
रोगी भालत मसिओरं सजं दयके छाया । (९)<sup>१</sup>

(सति वय् धकाः ल्वगि भाःतयात हेय्केगु हे छाया ? थुकथं (हेय्काः) थम्हं फुक्क  
सम्पति काय्गु छाया ? ल्वगि भाःत मसिवं हे चिता दय्केगु छाया ?)

मिसाओ विश्वास व्याक छु मिजन धाय,  
डन्हिपेड मदु पशु थ्वम्हयात धाय,  
नयाव तियाव छाया न्हास गन काय । (१०)

(मिसातय्त विश्वास याइपिं मिजंतय्त नं छु धाय्गु ? थ्वयात न्हिप्यं मदुम्ह पशु  
धाय् । नयाः तियाः जूसां न्हाय् गन तयाजुइगु ?)

थिति कुति वजुंजुया नाति कुति छाया,  
हूं सरिलस दतडाव सुया मुचा धाय,

---

<sup>१</sup> ल्वगि भाःत मसिवं हे चिता दय्केगु छाया ?)

थ्व जुगया मिसातवं चलिद्र ख ल्हायः

सति वने धका लोगि भालत हेहेके छायाः

लोगी भालत मसिवन सजं दयके छाया मत्य २ ॥२०॥ (तमोट, ११०१ : ३२३)

अगिलिस केनडओ ध्वाकां पिने वाय । (११)<sup>१</sup>

(थितिकृति बःमूनिया नातिकृति छाय् ? प्वाथय् दय्वं सुया मचा धाय्गु ? काकय्चाय्  
क्यंका मचा ध्वाखापिने वाय् ।)

जात मखं मार जुया खंखंम्हओ जाय,

थओ जात तोरताव राकराकं काय,

लारे लारे तिसं जुय बान तासे छाय् । (१२)<sup>२</sup>

(थःगु जात मखनाः मालानी (बरेया स्त्रीलिङ्ग) खंखंम्ह लिनाजुइगु । थःगु जातया मिजं  
त्वःताः न्ह्यःनेलाःपिं भाःत कयाजुइगु । लालाःपिं तिया जुयाः बांलाः ताय्केगु छाय् ?)

लज्या याक व्यापारिया कपट ज्या छाय्,

खडओसं मखं ज्याला दुगं खंक काय,

जमया सभास अन गथ्य जवाफ याय । (१३)<sup>४</sup>

(लनेज्या याइम्ह (तुलाधर) व्यापारी हानं कपट ज्या छाय् याय्गु ? खंकं मखंकं  
ज्याला दुगंछि काइ । थजाःम्ह मनू यमराजया सभाय् गथे लिसः बी ?)

कर्ना मादु करमिया गुलितो ख ल्हाय,

न्हु बान्हिस ज्या ओयाओ ज्याला उतिं काय,

क्षओ वचनन मेव विश्वासन लाय । (१४)<sup>५</sup>

(कर्ना (कःमिया ज्याभः?) मदुम्ह कःमिया गुलि जक खँ ल्हाय्गु ? बान्हिजालय् ज्या  
याःवयाः उति हे (न्हिछिया) ज्याला काइगु । थःगु वचनं (नायूगु वचन ल्हानाः)  
मेपिनिगु विश्वास काइगु ।)

---

<sup>१</sup> नातिकृति बरम्हूनिया थितिकृति छायः

सलीलस दतनाव मचा सुया धायः

अज्ञानन दव मचा ध्वाकां पिने वयः (वाय) मत्य २ ॥८॥ (तमोट, ११०१ : ३२२)

<sup>२</sup> जात मखं मालानिया लाको म्हव जायः

थव जात तोलताव लाक्व २ कायः

थुगु लिला दैवन गथ्य सहायः मत्य २ ॥१७॥ (तमोट, ११०१ : ३२३)

<sup>४</sup> नज्या याक बेपालिया गुलित खल्हायः

ल्होज्या बोज्या अडेक ज्या थकलप्य छायः

लाले २ बध तया मफुत लिफ्पायः मते २ ॥६॥ (तमोट, ११०१ : ३२२)

<sup>५</sup> करुणा मदु करमिया गुलित खल्हाय

न्हि बान्हिस ज्या वया ज्याला उतिं कालः

थुगुलिया पापन हापु गन लायः मत्य २ ॥१९॥ (तमोट, ११०१ : ३२३)

लाज मदु ज्यापुमिया रचना ख छाया,  
देओ धर्म साछि यासे मेवया बुज्या याय,  
थमं लोभ याड भूमियात दोख छाया । (१५)

(लज्या मदुम्ह ज्यापुया बांला:गु खँ ल्हाय्गु हे छाया ? द्यः, धर्म साक्षी तया:  
(पा:फय्का) मेपिनिगु बुँज्या याइगु । थम्हं लोभ याना: भूमियात छाया दोष बीगु ?)

साधु छुड चोड तति लास गन काय,  
नाना चोया परिगा ज्या तेओ खे ध्या याय,  
बिपतिस गलतिया धाको मूल काय । (१६)

(साधु थें पहयानाच्चपिसं लाय् गन काय्गु ?...मनूतय्गु विपत्ती थमं धाक्व मू काय्गु ।)

नाम दड ज्या याक करिया ख ल्हाय,  
ल्होज्या बुज्या अनेक ज्या थकरप छाया,  
रोरे रोरे बध तया मफतो लिकाय । (१७)<sup>६</sup>

(नां दंगु ज्या याइम्ह कौया खँल्हाय् । ल्त्वनेगु ज्याय्, कुबुइगु ज्याय् थकय् याय्गु  
छाय् ? मा:मा:बलय् बहः तया: लिपा लिकाय् (लिफ्याय्) मफुत ।)

डालु फाकु छिन्दलपे जुओ नउ धाय,  
संकटस पारलप ग्याकम्ह तु ख्याय,  
ओने माल परलोक मभारपे छाया । (१८)<sup>७</sup>

(न्यालु, फाकु सवा: कयाजुइमह नौ थ:गु संकट चीकेत ग्या:पिन्त ख्याना जुइगु ।  
थुमिसं परलोक वनेमानिगु खँ छाया भा:मपिल ?)

छलछाम अति सओ छिपाया ख ल्हाय,  
थुगुलि सियाओ थ्वओ विश्वास मयाय,  
थम यथ्य खेलरपे मेरे रास काय । (१९)

(छलछाम अति याय् स:म्ह छिपाया खँल्हाय् । थुगु खँ थुइका: वयात विश्वास  
मयाय् माल । मेथाय् लाय् (ध्यबा) कया: थ: यत्थे छचलाजुइपिं ख: थुपिं ।)

---

<sup>६</sup> नज्या याक वेपालिया गुलित खल्हाय:  
ल्होज्या बोज्या अडेक ज्या थकलप्य छाया:  
लाले २ बध तया मफुत लिफ्याय: मते २ ॥६॥ (तमोट, ११०१ : ३२२)

<sup>७</sup> डालु फाकु बिघलपु नलिया ख ल्हाय:  
बिपतिसं गलेतिया धाको माको काल:  
थुगुलिया पाहापन नरकसं ह्वायु: मत्य २ ॥११॥ (तमोट, ११०१ : ३२२)



मति तओ सालमिन गति तन लाय,  
थओ बल दतडाव थओ थओ स्याय,

मदु मदु ख दुता ओ थम दे थ्य लाय । (२०)

(मती तः थें सायूमित गन गति लाइ ? थःके बल दतले थुपिं थःथः स्यानाजुइ ।  
म्वाःमदुगु खँल्हानाः थम्हं धै थे कयाजुइ (मेपिनिगु सम्पति?) ।)

जस मदु वैदे देदि लम्हियात धाय,

म्हति म्हति थओ ज्यास थ्वपिं चाहा याय,

थओ ज्या सिधरडाओ थ्वपिं स्वम्हं वाय । (२१)<sup>८</sup>

(वैद्य, दिदिअजि व लमि (थुपिं स्वखलः ज्या याना नं जस काय् मखपिं खः । थःपिन्त  
माल धाःसा म्हतिं(म्हतिं हे थुमित सःता जुइ । थःगु ज्या पूवनेवं थुमित वानाछ्वइ  
(वास्ता याइमखु) ।)

बुरिबारि जाकि बजि मिओ थास थाय,

छगुलि हतस म्हनि म्हनि भाओ छाया,

कुलें काय त्वाक बिय गुलि लव धाय । (२२)<sup>९</sup>

(बुँइ व क्यबय् सःगु वस्तु व जाकि, बजि मीगु थासय् छगू हे वस्तुयात(?) म्हतिं  
म्हतिं भाः याय्गु छाया ? कुलिं कयाः त्वाकं बियाः गुलि लवः काय्गु ?)

संसारया आसा दुदु लंख छयाय छाया,

थथिंड ज्या दैवन गन सह याय,

यनिओ खे छम्ह छम्ह नरकसं व्हाय । (२३)<sup>१०</sup>

(संसारं आशा याइगु दुरुइ छाया लः त्वाकछचय्गु ? थजाःगु ज्या याइम्हसित दैवं  
नं गन सहयाइ ? थजाःपिं छम्ह(छम्हसित नरकय् त्वाइ (क्वफाइ) ।)

---

<sup>८</sup> जस मदु वैद्य दिदी लम्हियातं धायः

थव २ म्हति ज्यास थ्वपिं चाहा यायः

थव ज्या सिधलना थ्वपिं स्वम्हं वायः मतय २ ॥१५॥

<sup>९</sup> जाकि बजि बुलिबालि पसल्याया ख ल्हायः

कुल्यं कया माना मिया गुलि लव धायः मतय २ ॥१३॥ (तमोट, ११०१ : ३२२)

<sup>१०</sup> संसालया आसा दुदु लंख क्षाय छायाः

थुगुलि जा दइवन गथ्य सहयायः

यनिव ख्य छम्हा २ नरकस त्वायुः मतय २ ॥९॥ (तमोट, ११०१ : ३२२)

अनहुनि नायया बनज ख ल्हाय,  
च्या दामन पल विय हिस थुने छने छा़य,  
थथिंड डकरनि न हापु गन लाय । (२४)<sup>११</sup>

(याय्मत्यःगु ज्या याइम्ह नाय्या बनज (व्यापार) या खँल्हाय् । छगू पल (पाउ)  
लाया च्यादाँ कया नं हानं छा़य् ही थुनेमाल ? थजाःगु पापं हापु गन चूलाइ ?)

चाज्या याक कुमारया नाना भदा ज्याय,  
थओ सरिरन फको वुसे चा दुकाय,  
चाहारपु दओ धक मते मुल छा़य । (२५)<sup>१२</sup>

चाज्या याइम्ह कुमालं थीथी थलबल दय्की । थम्ह (शरीरं) कुबुइ फक्व चा  
दुकाइ । माःपिं (न्याःपिं) दु धकाः माक्व (यक्व) मू काय्गु छा़य् ?)

धान दको मुने सुरिनिता छेस थाय,  
जुर ल्वाय धन खुय थुलि चिवा याय,  
नरक बिनान मद ओम्ह वने थाय । (२६)

(सुलिनीया छैय् धन दक्व मुनी । जू ल्वाय्गु (म्हतेगु), खुइखाय्गु खँ व्याकीतु न.  
थन हे । थजाःम्ह मनू नरक बाहेक मेगु वनेगु थाय् मदु ।)

ब्राम्हण बदे आचार सोम्हस ख ल्हाय,  
जातपात लिमसोसे देक्षा विय छा़य,  
पापी पाखंडिया धन काय छु बदाय । (२७)<sup>१३</sup>

(ब्रम्ह, आचाजु व दरेया खँल्हाय् । छिमिसं जातपात लिमस्वःसे दीक्षा बीगु  
छा़य् ? पापी व पाखण्डीया धन कयाः छु तःधं जुइ ।)

---

<sup>११</sup> अनहुनि नायया बनजाया खल्हायः

भिरामन (भिदामन) पल मिया हिस थुडे छा़यः

थुगुलिया पाहापन हापू गन लायूः मत्य २ ॥१०॥ (तमोट, ११०१ : ३२२)

<sup>१२</sup> चाज्या याक कुम्हालया नारा भारा ज्यायः

थव सरिरन फको वूसं चा दुकायः

चाहाइ याना बल धक मते मुल छा़यः मत्य २ ॥२१॥ (तमोट, ११०१ : ३२३)

<sup>१३</sup> ब्राम्हुलि बरे आचा गुभायातं धायः

जातपात लिमस्वस्य देखा विय छा़यः

दाहामस लोभ तथा थथ्य याकं यालाः

थुगुलि पाहापनः नरकसं त्वाय मते २ ॥५॥ (तमोट, ११०१ : ३२१(२२))

असारन काया धन संपत्ति छु याय,  
थमन मसियागुरि दयिओ उपाय,  
सिसे याडागुरि पाप मदते उपाय । (२८)

(सार हे मदयूक (मत्त्यूक) कयागु धन(सम्पत्ति) छु यायूत ? थमं मसीक यानागु (पाप) या उपाय (मोचन) दु । सीक सीकं यानागु पापया उपाय धाःसा मदु ।)

विवेकन मसोकम्ह खेनिक छु धाय,  
बल मदुम्हया गन दुखया ख ल्हाय,  
बलकर थुरम्हन अंगिरपे छाया । (२९)

विवेक मदुम्ह सैनिकया (?) छु खँल्हायूगु ? बःमलाःम्हया गनया दुःखया खँल्हायूगु । बःलाःम्हलिसे हे लिनाजुइगु छाया ?)

ग्रहन मसिओ जोसि जोतिक छु धाय,  
जुगय् मदु सेकरात्रिनि न्ह दयके छाया,  
थुगुरि पापन छन अन छु दो काय । (३०)

(ग्रहण मस्यूम्ह जोशीया छु खँल्हायूगु ? जुगय् मदुगु सेकरात्रिनि दिन नं दयूकेगु छाया ? थजाःगु पाप यायम्हसित अन (स्वर्गय्) छु दुकाइ ?)

धनस तु मन तसे मेव तुने छाया,  
धनन्त न दुख सुख ख छहति ल्हाय,  
ग्यानि गुनिकन मते उपहास याय । (३१)

(धनय् मनं तयाः मेगु मनंतुने छाया ? धनन्त दुःख(सुखया) खँ भतिचा ल्हाय । थ्व खँय् ज्ञानी, गुणीपिसं हिस्साय्मते ।)

बुद्ध धर्म संघ नाम न्हिथडनं काय,  
संसारस मोहलप थिन सुख लाय,  
उगुलिस चोने दओ देवपनि थाय । (३२)

(बुद्ध(धर्म(संघया नां न्हिं(न्हिं) काय । संसारयात हे मोह याइगु सुख लाय । उकेंयानाः द्यःपिं च्वनीथाय् थः नं च्वने ।)

थुगुलि कथा विवेक यायिओ खे जमन,  
यया यथ्य मदु अन थिन थ्य जा जमन  
ओनिओ खे छम्ह छम्ह न्हिथड थ ओलनं,  
ओने थओ म्हाति म्हाति करनि कुबुयान । (३३)

(थुगु कथा यात यमराजं नं बिचाः याइ । यमराजया थासय् यःपिनि यत्थे याय्मदु ।  
थनं न्हिथं हे यमराजयाथाय् वनाच्चनी । थथे वनीपिसं थःथःगु कर्म कुबुयावनी ।)

थ्व संसारस उधार यायिओ ग्वम्हसेन,  
ब्रम्हा विष्णु महेश्वर करुणामयनं ।  
श्रीजयप्रकाश मल जुजुसेनं,  
यक छत्रपति जुसे दसल कुसलनं । (३४)

(थ्व संसारयात ब्रम्हा, विष्णु, महेश्वर, करुणामयनं उद्धार याइ । श्री जयप्रकाश  
मल्ल जुजुं एक छत्रपति जुयाः कुशल याय् फय्मा ।)

इति लोकचरित्र गीत समाप्त ।

नमो बुद्धाय नमो धर्माय नमो संघाय शुभ । (३५)

(लोकचरित्र म्ये क्वचाल । बुद्धयात नमस्कार, धर्मयात नमस्कार, संघयात  
नमस्कार । सकसियां भिं जुइमा ।)

थ्व म्येय् म्येचिनामि धनन्तया समाजय् दुपिं थीथी जात व वर्गयात  
ध्याचूनकातःगु दु । सम्पति ल्हातय् लाकेत सीत्यंम्ह रोगी भात कयाजुइपिं मिसात(९),  
न्त्याम्हं मिसातय् विश्वास यानाजुइपिं मिजंत(१०), नातिकुति खं ल्हानाः नं  
ल्यवः कयाजुइपिं बःमुनीत(११), थःगु जात त्वःताः मेगु जातया मिजंत ल्यवः  
कयाजुइपिं मालानीत(१२), ताल्जु ज्वनाः व्यापार याइपिं बज्जाःत(१३), कःमित(१४),  
ज्यापुत(१५), नज्या याइपिं कौत(१७), नौ(१८), छिपा(१९), साय्मि(२०), दिदिअजि  
व लमि (२१), त्वाकं दानाः मीपिं बज्जाःत(२२), दुरु मीपिं(२३), ला मीपिं नाय्त  
(२४), कुमाःत(२५), सुलिनी(२६), ब्राम्हण, बरे, आःचाःजु(२७), सैनिक?(२९),  
जोशी(३०)तय् थम्हं खं थें इमिगु पापज्यायात कुंखिनाः ध्याचू नकातःगु दु ।

थ्व म्ये च्वःम्ह धनन्त बौद्ध धर्मप्रति आस्था दुम्ह खः धइगु खं म्येया न्हापांगु  
पादय् हे ‘ॐ नमो बुद्धाय’ धयातःगुलिं स्पष्ट याः । स्वंगु पादय् ‘शाक्यमुनि’

धयातःगु स्यंगुइ थहावने धयातःगुलिं स्वयम्भुइ गःचाःहिलाः हालीगु नं स्पष्ट जू । तर, धनन्तं थःगु जात धाःसा च्वयामतः । थथे कुखिनेगु, ध्याचू नकेगु धैगु थःथःगु वैयक्तिक दृष्टिकोण जक खः अथवा थ्व जातीय व वर्गीय दृष्टिकोण जक खः । थुपिं सर्वव्यापी, सर्वकाल, सर्ववर्गयानितिं ग्रहण याय्फइमखु । थ्व म्येया १५ गु पादय् ज्यापुतय्त भूमिया दोष बियाः तःसियात लथ्यानाजुइपिं धैगु आसय व्यक्त यानातःगु दु । अथेहे लमि व दिदिअजिपिन्त नं दोष क्यनाः ध्याचू नकातःगु दु । थ्व हे विषयलय् धनन्तसिवें यक्व दँ न्ह्यः जगज्योति मल्ल(नेसं ७२६(७५३) 'ज्या दतले ज्यापु माल, ज्या सिधय्वं ज्याला बी म्वाःल' धकाः ज्यापुतय्त अन्य वर्ग शोषण याइगु खँ च्वयातःगु दु । अथे हे 'तिरि पुरुष महोंतले लमियात महतव बीगु, होंसांनिसे लमि म्वाःलिगु धकाः स्वार्थी समाजयात ध्याचू नकातःगु दु । अथेजूगु थजाःगु कुखिनाखँ, ध्याचू धइगु समाजसापेक्ष, वर्गसापेक्ष, जातजातिसापेक्ष, समयसापेक्ष, स्थानसापेक्ष जुइ ।

## लिधंसा

तमोट, काशीनाथ, १९०९, *पुलांगु मे मुना* । कान्तिपुर : नेपालभाषा परिषद ।  
वैद्य, जनकलाल, १९२२, *नेपालभाषाया प्राचीन काव्य सिर्जना* । यें : नेपाल राजकीय प्रज्ञा-प्रतिष्ठान ।

Lienhard, Siegfried, 1992, *Songs of Nepal An Anthology of Nevar Folksongs and Hymns*. Delhi: Motilal Banarasidass Publisher Private Limited.

ज्यापु समाज, यलपाखें  
मदिक्क पिथना वयाच्चंगु नेपालभाषाया निलापौ  
**धिमय् पौ**  
ब्बना दिसँ ब्वंका दिसँ ।